

PF*i*NDLA

Nhlayu 3 | Lembe 3 | Mawuwana – Mhawuri – Ntsrhati | 2023

Masungulu ya Gramatka dzra Xizronga

HIKUME



www.xizronga.org

Publicidade



SERVIÇOS DE EDIÇÃO E REVISÃO LINGUÍSTICA

Acabe com **embarassos** em-
baraços de escrita em portu-
guês e inglês!

Contrate a "Dumbeka Editores e Consultores, Sociedade Unipessoal, Limitada", abreviadamente "Dumbeka, Lda.", para rever e editar os seus documentos a um incrível preço de 1,00MT por palavra! Garantimos-lhe total confidencialidade e excelente qualidade de serviços.



Edição e revisão
linguística de
correspondência
comercial

Edição e revisão
linguística de documentos
técnicos e científicos

Edição e revisão
linguística de jornais,
revistas e outros
periódicos

Edição e revisão
linguística de teses,
dissertações e
monografias

Assistência na escrita
de qualquer tipo de
documento

DUMBEKA, LDA

Rua de Vundiça Nº 235,
B. Liberdade, Cidade da
Matola

Celulares: 845188424/
879999269/827194852

Visite www.dumbeka.com
Email: info.dumbeka@gmail.com

Zritu Dzra Muhleli

Tindzrimi hinkwatu ti ni milawu ya mavulavulela leyi vavulavuli va mapsaliwa vami-dondzraka hi kuyingela ni kuyetisela vapsele ni vavulavuli van'wana amugangeni wavu. Milawu leyi mivitaniwa gramatka. Xizronga xi ni gramatka dzra xone, kambe svakala kukuma buku ledzritlhamuxelaka gramatka ledzri.

Ku nhlayu leyi ya *PFINDLA*, hidzringisa kubeka masungulu ya gramatka dzra Xizronga hi kukambisisa xivumbeko xa **mavito**. Andzreni ka nhlokomhaka leyi hikambisisa mintlawu ya mavito, hi nkongometo wa kutiva ndlela leyi mavito matilongoloxaka ha yone hi ntumbuluku. Hi laha kufanaka, hikambisisa vunavi bza mavito ni ndlela leyi mavito matsrongahatiwaka ni kukulisiwa ha yone. Kunavela kwezru i kuva masungulu lawa ya gramatka dzra Xizronga mangapfuna Muzronga mun'wana ni mun'wana akuva ayetelela akuvulavuleni lokunene ka lidzrimi ledzri.

Tikholisani, maxaka!



Armando A. Magaia,
Muzrangeli ni Muhleli

VUDZRUNGULI BZA VUGANDLISI:

Vito dzra Revhixta: *Pfindla*

Doropa dzra Vupaluxi: KaMatsrolo

Nhlayu ya Vugandlisi: Ya vu3 ya lembe dzra vu3, Mawuwana, Mhawuri, Ntsrhati, 2023 (Tihweti ta 7-9, ta lembe dzra 2023)

N'winyi: Dumbeka Editores & Consultores, Sociedade Unipessoal, Lda.

Muzrangeli ni Muhleli: Armando Adriano Magaia

Vutsrali/Vuhleli/Vubasisi bza tsralwa: Armando A. Magaia; Arlindo A. Magaia; Francisco A. Magaia; Jacob A. Magaia; Leta A. Magaia; Sacadura A. Chilundzo

Muti wa Vutsrali ni Vuzrangeli: Rua de Vundiça Nº 235, B. Liberdade, Matola

Websayti: www.dumbeka.com

Liqunga: (+258) 845188424/ 879999269/ 827194852

WhatsApp/Telegram: (+258) 845188424

Email: info.dumbeka@gmail.com

Vuyaveli: <https://www.xizronga.org/> ni tindlela tin'wana hi mahala

Minkama ya Vugandlisi: Kamune hi lembe

Nhlayu ya Vutsralisi: GABINFO/ DEPC/2021

© Dumbeka Editores & Consultores, Sociedade Unipessoal, Lda.

Esta publicação está disponível para download gratuito no formato PDF no site <https://www.xizronga.org>. É permitida a reprodução parcial ou total desta publicação, desde que citada a fonte e que não seja para a venda ou qualquer fim comercial.

<i>Tinhlokomhaka</i>	<i>Tluka</i>
Ntlhamuxelo ni mixaka ya mavito	5
Kucincacinca ka xivumbeko xa mavito	6
Vunavi bza mavito ni svilandzri sva vunavi	25
Ntsrongahatiwo	28
Nkulisiwo	39
Xithhokovetelo	41
Dondzra Xizronga	42
Hungata hi Kudondzra	43

Ntlhamuxelo ni mixaka ya mavito

Vito i zritu ledzritizrelaka kuvitana ntlawa wini na wini wa vhanu, mimbangu, kumbe minchumu. Zritu “vito” dzringathela dzrivitaniwa **liviti**. Ku ni mavito ya kuhambanahambana.

1. **Mavitavito** mavitana vhanu, minchumu kumbe mimbangu ya kukongoma mfuzri masungula hi letela ledzrikulu. Sвилiki, mavitavito mahlaya lesvaku i mani mhunu wa kone kumbe nchumu lowuvitaniwaka svanga hiloko ali mhunu. Svikombiso:

- Matsrolo, Mangaxana, KaNyaka, Nghilandhi, Nkomati, Save, nsv.

Ku svihitana matizrela kuvitana svihazri ingiki i vhanu. Svikombiso:

- N'wampfundla na N'wamhunti.
2. **Mavito ya minchumu** mavitana vhanu, minchumu, svihazri kumbe mimbangu na mangakongomi, nakone masungula hi letela ledzritsrongo. Sвилiki, mavito ya minchumu mahlaya lesvaku i yini nchumu wa kone kumbe mhunu lweyi kukhaneliwaka ha yene. Svikombiso:
- Musveki, muxavi, mpfundla, xikole, nsimu, nsv.
3. **Mavito ya mintlawwa** mavitana mintlawwa; zritu dzrin'we dzrihlanya nhlayu ya kusukela ku minchumu mibidzri. Svikombiso:
- Butsrhu, ndangu, xitsrhungu, ntlhambi, nsv.

4. **Mavito ya sviyanakanyiwa**

machula minchumu lemi-
ngavoniwikiki hi mahlo ku-
mbe kukhumbiwa hi ma-
voko. Svikombiso:

- Moya, magolo, kuzrula, ku-
lebza, pongwe, mona, nsv.

Kucincacinca ka xivumbeko xa mavito

KUCINCACINCA KA MAVITO HI NHLAYU

Mavito mangava ku **vun’we** kumbe **vunyingi**. Kucincacinca koloko kufambelana ni ntlawa lowu vito dzrilumbaka wone. Svikombiso:

NHL.	VUN’WE	VUNYINGI
1.	mpfundla	<u>mi</u> mpfundla
2.	yindlu	<u>ti</u> yindlu
3.	zribze	<u>ma</u> zribze
4.	lisiva	<u>ti</u> nsiva
5.	xisaka	<u>svi</u> saka

Nambitanu, ma kone mavito lamangasukikiki ku vun'we maya ku vuningi. Svikombiso:

- Kuzrula, lizrandzru, lizrezre, vukwele, vutomi, nsv.

Hi tlhelo dzrin'wana, ma kone mavito lamanga ku vuningi kambe na mangasukeli ku vun'we. Svikombiso:

- Tingana, mati, mazri, madzrimi, mihoni, nsv.

KUCINCACINCA KA MAVITO HI NTLAWA WA MAVITO

Mintlawwa ya mavito i mintlawwa lemilongoloxaka mavito hi kuya hi matsrhamela ya wone ya ntumbuluku, lamapfumelelaka kuvumba sviga lesvinga ni mpfumelelanu. Xizronga, kufana ni tindzrimi tin'wana ta Xintu, xilongoloxa mavito hi kulandzra

mintlawwa ya ntumbuluku leyi malumbaka yone. Malongoloxela lawo ya mavito majula kufana ni ya **lixaka** ku Xiputukezi, kambe mahambana hi lesvaku, amatsrhan'wini ya kuhambanisa zritu hi kuya hi lesvaku i dzra xinuna kumbe i dzra xisati, ntlawa wa mavito wulongoloxa mazritu lamalumbaka lixaka dzrin'we ntsena.

Kusukela hi Dzana dzra ^{vu}19, tintivi ta tindzrimi ta Xintu tikambisisi titlhela tihlela mintlawwa ya mavito lemingatlhasaka ku 23. Mayelanu ni Xizronga, kutalisa kuhlayiwa lesvaku ku ni mintlawwa ya mavito ya 16, minga leyi: 1 (mu-), 2 (va-), 3 (mu-), 4 (mi-), 5 (dzri-), 6 (ma-), 7 (xi-), 8 (svi-), 9 (yi-), 10 (ti-), 11 (li-), 14 (vu-), 15 (ku-), 16 (ha-), 17 (ku-) na 18 (mu-). Mintlawwa leyo hakanyingi mivoneka ha hombe hi xizrangi

lexinga ku mazritu ya ntlawa ni ntlawa, kambe minkama min'wana asvikhanyi lesvaku hi xini. Hi tlhelo dzrin'wana, vunyingsi bza mintlawa ya mavito bzi-famba hi mibidzrimibidzri, kambe minkama min'wana kova ni mun'we ntsena. Handle ka lesvo, kuhambana ni mazritu ya

vunyingsi bza mintlawa mapfu-melaka kutameliwa svanga **ma-vito**, mazritu lawa kuhlayiwaka lesvaku malumba mintlawa 16, 17 na 18 mangahavoniwa svanga **mazrangeli** kumbe **mayengeteli**. — Vona minxaxa-meto ya mintlawa laha hansi.

NTLAWA WA MAVITO WA ^{KU1}: MU-	
Nhlayu	Vun'we (vunyingsi bzihambiwa hi ntlawa wa ^{VU2} : va-)
Lisivinene	Yene
Matsrha-mela	Vunyingsi bza mazritu bzi ni xizrangi mu- ; man'wana mavoniwa hi xizrangi n- kumbe n'wa- ; minkama min'wana xizrangi axivoneki. Ntlawa ngopfungopfu wupatsra vhanu; minkama min'wana wupatsra svihazri kumbe minchumu lemimhunuhatiwaka ni mavito ya milambu
Svikombiso	Mudzrimi, muyeni, mudondzri, muyaki, muhambi, mutizri, mufi, nala, nandzra, nsati, nuna, n'wana, n'wingi, n'winyi, tatana, mamana, zrazrana, kokwana, Muzondi, Mangaxana, Muzronga, Muputukezi, n'wahulwana, n'wahuva, N'wagumbaxilalelo, Mbuluza, Nkomati, nsv.

NTLAWA WA MAVITO WA ^{vu}2: VA-	
Nhlayu	Vunyingi (vun'we bzhambiwa hi ntlawa wa ^{ku} 1: mu-)
Lisivinene	Vone
Matsrha-mela	Mazritu hinkwawu ma ni xizrangi va-. Ntlawa ngopfungopfu wupatsra vhanu; minkama min'wana wupatsra svihazri kumbe minchumu lemimhunuhati-waka
Svikombiso	Vadzrimi, vayeni, vadondzri, vayaki, vahambi, vatizri, vafi, valala, vasati, vanuna, vana, vingi, vinyi, vata-tana, vamamana, vazrazrana, vakokwana, Vazronga, Vaputukezi, van'wahulwana, nsv.

NTLAWA WA MAVITO WA ^{vu}3: MU-	
Nhlayu	Vun'we (vunyingi bzhambiwa hi ntlawa wa ^{vu} 4: mi-)
Lisivinene	Wone
Matsrha-mela	Vunyingi bza mazritu bzi ni xizrangi mu- kumbe n-. Ntlawa wupatsra minsinya, svizro sva mizri, minchumu, sviyanakanyiwa, nsv.
Svikombiso	Mbangu, mbenga, musu, muti, muzri, muzru, mubede, mutundu, mpfundla, mfumu, mpfungulu, muganga, muggomo, mutorotoro, mbhomu, nkama, nkolo, nenge, nyembeti, nkuma, nkonya, nkindzru, nkhokho, nhlana, nsala, nsisi, nkwama, nkwakwa, nyuku, ntamu, ntlatu, ntlawa, ntlhamuxelo, ntimu, ntizro, ntuzru, ndzringo, nchavu, nsv.

NTLAWA WA MAVITO WA ^{vu}4: MI-	
Nhlayu	Vunyingi (vun'we bzihambiwa hi ntlawa wa ^{vu} 3: mu-)
Lisivinene	Yone
Matsrha-mela	Mazritu hinkwawu ma ni xizrangi mi-. Ntlawa wupatsra minsinya, svizro sva mizri, minchumu, sviyanakanyiwa, nsv.
Svikombiso	Mimbangu, mimbenga, misi, miti, mizri, mimuzru, mi-bede, mitundu, mimpfundla, mimfumu, mimpfungulu, miganga, migqomo, mitorotoro, mimbhomu, minkama, minkolo, milenge, minyembeti, minkuma, minkonya, minkindzru, minkhokho, minhlana, minsala, misisi, minkwama, minkwakwa, minyuku, mintamu, mintlatu, mintlawwa, mintlhamuxelo, mintimu, mintizro, mintuzru, mimoya, mindzringo, minchavu, nsv.

NTLAWA WA MAVITO WA ^{vu}5: DZRI-	
Nhlayu	Vun'we (vunyingi bzihambiwa hi ntlawa wa ^{vu} 6: ma-)
Lisivinene	Dzrone
Matsrha-mela	Mazritu hinkwawu ama na xizrangi lexivonekaka; xotikomba ntsena hi vunyingi ku ntlawa wa ^{vu} 6. Ntlawa wupatsra mihandzru, svizro sva mizri, minchumu, svihazri, sviyanakanyiwa, nsv.
Svikombiso	Buku, bucha, buwana, bzatsrhu, bzangama, bzitana, chati, chuzri, doropa, kawula, kaju, kanyi, khalavatla, kwakwa, hanxi, sala, tobo, khombo, khondlo, khele,

	khutla, lompfana, pulangu, tamunga, tihlo, tinyo, tiko, tsrolo, zreve, tuva, voko, voya, vumba, vungwa, xaka, xwavi, zrambu, zranga, zribze, zrompfa, zrengu, zritu, zrole, zambana, tovoko, tlhazri, nsv.
--	--

NTLAWA WA MAVITO WA ^{vu6}: MA-	
Nhlayu	Vunyingi (vun'we bzihambiwa hi ntlawa wa ^{vu5} : dzri-)
Lisivinene	Wone
Matsrha-mela	Mazritu hinkwawu mazranga hi ma-; ntlawa wupatsra minchumu, minsinya, svihazri, nsv.
Svikombiso	mabuku, mabucha, mabuwana, mabzatsrhu, mabzangama, mabzitana, machati, machuzri, madoropa, makawula, makaju, makanyi, makhalavatla, makwakwa, mahanxi, masala, matobo, makhombo, makhondlo, makhele, makhutla, malompfana, mapulangu, matamunga, matihlo, matinyo, matiko, matsrolo, mazreve, matuva, mavoko, mavoya, mavumba, mavungwa, maxaka, maxwavi, mazrambu, mazranga, mazribze, mazrompfa, mazrengu, mazritu, mazrole, mazambana, matovoko, matlhazri, mati, nsv.

NTLAWA WA MAVITO WA ^{vu7}: XI-	
Nhlayu	Vun'we (vunyingi bzihambiwa hi ntlawa wa ^{vu8} : svi-)
Lisivinene	Xone
Matsrha-mela	Mazritu hinkwawu ma ni xizrangi xi-. Ntlawa ha-kanyingi wupatsra minchumu, svihazri, svizro sva mizri kumbe matsrhamela ya vumhunu; loko wupatsra vhanu, svikomba kuxiyeka kumbe kudzreleka, nambi kuzrandzreka kwavu, nsv.
Svikombiso	Xinana, xiyendlwa, ximphunta, xilema, xikole, xikoti, xisaka, xikomu, xihena, xihundla, xikoxa, xin'wanana, xizrombe, xisiwana, xiyindlwana, xihuvana, xiloso, xisolo, xipixi, xifambu, xisuti, xihlawuhlalu, xixixi, xinakunobze, xisolo, xidoho, xitizri, xiyimbeleli, xidi, xiyaki, xib'ochwa, xizrami, xitlhangu, xifambu, Xizronga, nsv.

NTLAWA WA MAVITO WA ^{vu8}: SVI-	
Nhlayu	Vunyingi (vun'we bzihambiwa hi ntlawa wa ^{vu7} : xi-)
Lisivinene	Svone
Matsrha-mela	Mazritu hinkwawu ma ni xizrangi svi-. Ntlawa ha-kanyingi wupatsra minchumu, svihazri, sviyana-kanyiwa kumbe svizro sva mizri; loko wupatsra vhanu, svikomba kuxiyeka kumbe kudzreleka, nambi kuzrandzreka kwavu, nsv.

Svikombiso	svinana, sviyendlwa, svimphunta, svilema, svikole, svikoti, svisaka, svikommu, svihena, svihundla, svikoxa, svivanana, svizrombe, svisiwana, sviyindlwana, svihuvana, sviloso, svisolo svipixi, svifambu, svisuti, svisolo, svidoho, svitizri, sviyimbeleli, svidi, sviyaki, svib'ochwa, svitlhangu, svifambu, nsv.
-------------------	---

NTLAWA WA MAVITO WA ^{vu9}: YI	
Nhlayu	Vun'we (Vunyingi bzihambiwa hi ntlawa wa ^{vu10a} : ti-)
Lisivinene	Yone
Matsrhamelela	Mazritu manyingi masungula hi n- kambe man'wana ya kutala ama na xizrangi. Ntlawa wupatsra svihazri, minchumu, mintizro kumbe tsrhamela dzra vutomi bza mhunu, vuxaka, nsv.
Svikombiso	Homu, nhompfu, hosi, havu, huku, nyala, nyama, nyoka, nyonga, nyenge, ngoti, nguluve, ngwama, nhlambeto, mbabzi, nhlanyi, ntivi, n'anga, nhlonge, nhlungu, nhondzrwa, nhombe, nhonga, nhome, njombo, nghozi, nkavi, n'whazri, nhenha, mfenhe, ntsrumi, ndzruna, ndota, nsv.

NTLAWA WA MAVITO WA ^{vu}10a: TI-	
Nhlayu	Vunyingi (Vun'we bzihambiwa hi ntlawa wa ^{vu} 9: yi-)
Lisivinene	Tone
Matsrha-mela	Mazritu hinkwawu ma ni xizrangi ti-. Ntlawa wupatsra svihazri, minchumu, mintizro kumbe tsrhamela dzra vutomi bza mhunu, vuxaka, nsv.
Svikombiso	tihomu, tinhompfu, tihosi, tihavu, tihuku, tinyala, tinyama, tinyoka, tinyonga, tinyenge, tingoti, tinguluve, tingwama, tinhlambeto, timbabzi, tinhlanyi, tintivi, tin'anga, tinhlonge, tinhlungu, tinhondzrwa, tinhombe, tinhonga, tinhome, tinjombo, tinghozi, tinkavi, tin'whazri, tinhenha, timfenhe, tintsrumi, tindzruna, tindota, nsv.

NTLAWA WA MAVITO WA ^{vu}11: LI-	
Nhlayu	Vun'we (Vunyingi bzihambiwa hi ntlawa wa ^{vu} 10b: tim-/tin-)
Lisivinene	Dzrone
Matsrha-mela	Mazritu hinkwawu ma ni xizrangi li-. Ntlawa wupatsra svizro sva mizri, minchumu, sviyanakanyiwa (matsrhamela ya vumhunu)
Svikombiso	Lizrandzru, lizrezre, likuku, lisungunu, lisiva, lisima, lidzrimi, likhalu, livambu, lilondzro, lihunyi, lihuhwe, linhi, livengo, litiho, limitsru, lihlampfu, limhondzro, likatla,

	lihohe, ligumba, linxonxa, lipanga, livala, likasi, lihlelo, likongotlo, lisimu, livaningu, lihlanga, nsv.
--	--

NTLAWA WA MAVITO WA ^{VU}10b: TIM-/TIN-	
Nhlayu	Vunyingi (Vun'we bzihambiwa hi ntlawa wa vu11: li-)
Lisivinene	Tone
Matsrha-mela	Kusuhi ni hinkwawu mazritu ma ni xizrangi tim- kumbe tin-. Ntlawa wupatsra svizro sva mizri, michumu, sviyanakanyiwa (matsrhamela ya vumhunu)
Svikombiso	tinkuku, tinsungunu, tinsiva, tindzrimi, tinkhalu, timbambu, tihunyi, tinhi, timbengo, tintiho, timitsru, tinhlampfu, timhondzro, tinkatla, tinkohe, tingumba, tinxonxa, timpanga, timbala, tinkasi, tinhlelo, tinkongotlo, tinsimu, timbaningu, tinhlanga, nsv.

NTLAWA WA MAVITO WA ^{VU}14: VU-	
Nhlayu	Vun'we ntsena
Lisivinene	Bzone
Matsrha-mela	Vunyingi bza mazritu ma ni xizrangi vu-/wu-. Matsrongo ma ni xizrangi bz- kumb vo-. Ntlawa wupatsra matsrhamela ya vumhunu kumbe ya minchumu, mintizro, svakunwa, mintlawa ya minchumu lemivoniwaka svanga lemingankontekikiki, nsv.
Svikombiso	Vukanyi, vuhimbi, vusuzra, vulombe, vuhlungu, vugevenga, vuxaka, vunghanu, vusocha, vufundhisi,

	vuyivi, vusva, vununa, vunanga, vudzrimi, vubasisi, vuhloti, vutsrhevi, vuloyi, vuzronga, vuxa, vupeladambu, vuhumbadambu, vunanu, vusenga, vusokoti, vusuna, vuluva, nsv.
--	--

NTLAWA WA MAVITO WA ^{VU}15: KU	
Nhlayu	Vun'we (Vunyingi abzihambiwi)
Lisivinene	Kone
Matsrhamelela	Mazritu hinkwawu ma ni xizrangi ku-. Ntlawa i wa mavito lamatiseketelaka ku mayenci ntsena.
Svikombiso	Kuzrula, kuhlanya, kudondzra, kutizra, kutihita, kuphikelela, kutikulisa, kutitsrongahata, kuyiva, kuhemba, kukula, kupsala, kutlhazriha, kumatha, kufa, kufeliwa, kuhembeliwa, kudeleliwa, kukanwanyisiwa, nsv.

NTLAWA WA MAVITO WA ^{VU}16: HA	
Nhlayu	Vun'we (Vunyingi abzihambiwi)
Lisivinene	Kone
Matsrhamelela	Mazritu hinkwawu i mayengeteli ya mbangu.
Svikombiso	Hala, halanu, halenu, hansi, henhla, laha, lahaya, nsv.

NTLAWA WA MAVITO WA ^{vu}17: KU	
Nhlayu	Vun'we (Vunyingi abzihambiwi)
Lisivinene	Kone
Matsrha-mela	Mazritu hinkwawu ma ni xizrangi ku-. Ntlawa i wa mavito lamatiseketelaka ku mayenci ntsena.
Svikombiso	Kule, kusuhi, kwini

NTLAWA WA MAVITO WA ^{vu}18: MU	
Nhlayu	Vun'we (Vunyingi abzihambiwi)
Lisivinene	Kone
Matsrha-mela	Mazritu hinkwawu i mayengeteli ya mbangu.
Svikombiso	Lomu, lomo, lomuya, makazri, ndzreni, ntsrhaku

MAZRITUNYANA MAYELANU NI MINTLAWA YA MAVITO

Mayelanu ni ntlawa wa ^{vu}4 (mu-)

Man'we ya mavito ya ntlawa lowu mapfumela kuyisiwa ku vunyingi hi tindlela tibidzri:

1. Hi kundzruluta mu- ava mi-: Xikombiso: muti (miti), mukwa (mikwa), musu (misi), mutwa

(mitwa), muzri (mizri), mutsru (mitsru); mutsrhu (mitsrhu);

2. Hi kubeka mi- ni vito dzra kusungula: Xikombiso: muti (mimuti), mukwa (mimukwa), musu (mimusu), mutwa (mimutwa), muzri (mimuzri), mutsru (mimutsru); mutsrhu (mimutsrhu).

**Kuma svitizro sva kudeketela sva xizronga
hi mahala ka www.xizronga.org!**



DR

Dicionário Ronga



BRN

**Bibele Hi Xizronga
Xa Namunhla**



BRX

**Bibele Hi Xizronga
Xa Xinyondzroma**

<https://dr.xizronga.org/>

https://www.xizronga.org/?smd_process_download=1&download_id=799

https://www.xizronga.org/?smd_process_download=1&download_id=802

Ku ni lava vatizrisaka ndlela ya vuzrazru, vaku: “mimiti”, “mimi-kwa”, “mimisi”, nsv. Kambe lesvo i xihoxo, hikusa loko hiyaka mavito ya vunyingi, ahimitizrisi mifungu mibidzri hi nkama wun'we. Svingafana ni loko mhunu aku “childrens” hi Xinghiza, svinga mphazamu.

Xiya, nambitanu, lesvaku vito “mumpfu” adzripfumeli kuva “mimpfu” kumbe “mimumpfu”. Dzricinca dzriva “mimpfi” ku vunyingi. Hi lesvo-ke, loko hihlaya xivumbiwa xin'we, hili i “mumpfu”. Kambe, loko svisukela ku svibidzri, i “mimpfi”. Nambilesvi vito ledzri dzritlhelaka dzripfumela kuva “timimpfi”, lesvo ahi kucinciwa ka “mumpfu” kambe svokomba tinxaka ta kuhambanahambana ta “mimpfi”. Lexi i xiyimu lexingatolovelekangakiki.

Mayelanu ni ntlawa wa ^{v11} (li-)

Magramatka ya xikhale, kupatsra ni Bibebe dzra kusungula dzra Xizronga, matizisa lisivinene “**lone**” hilesvi dzrichataka ni ntlawa “li-”. Svi tanu ni mfunu wa mpfumelelanu ni ntlawa wa mavito “l-” (la-, le, li-, lo-, lu-). Nambitanu, Vazronga va ni makumekume ya malembe na vatizrisa lisivinene “**dzrone**”, kumbe-xana hi kujula kutihambanisa ni mavulavulela ya Xichangana. Hi xikombiso, afa svitasindzrisa kuhlaya sva kufana ni lesvi: “**Li-tiho langa lavavisa, nakuve nitizra ngopfu ha lone.” Kambe namunhla, Vazronga vali: “**Litiho dzranga dzravavisa, nakuve nitizra ngopfu ha dzrone.”****

Nambitanu, ntlawa lowu awufanelanga kususiwa kumbe wuphazameliwa ni lowa ^{v5} (dzri-), hikusa hingalahla kupfumelelana ka wone ni ntlawa wa

^{vu}10b (tim-/tin-). Mavito hinkwawu ya ntlawa wa ^{vu}11 (li-) mayisiwa ku vunyingi hi kutizrisa ntlawa wa ^{vu}10b (tim-/tin-). Kosusiwa ntsena zritu “**lihunyi**”.

Xivangelo hi le-svaku zritu ledzri, loko dzrili ku vunyingi, adzringetsraliwi ni xinhompfu <m> kumbe <n>, hikusa lesvo svingacinca zritu hi kuhelela dzriva

“**timhunyi**”/” “**tinhunyi**”. Kambe, lesvaku xinhompfu afa xili kone kusunguleni svitikomba hi hlayela dzrin'wana dzra zritu ledzri aminkameni ya khale, kunga: “**likunyi**”. “**Likunyi**” ku vunyingi i “**tinkunyi**”.

Xin'wana xa kuxixiya mayelanu ni ntlawa wa ^{vu}11 (li-) hi lesvaku mavito ya ntlawa lowu, loko maya ku vunyingi na limitsru dzrisungula hi <v>, <v> acinca ava akuva achata ni “tim-” wa ntlawa wa 10b. Svikombiso:

- Livengo (timbengo), livoni (timboni), livalelo (timbalelo), tivala (timbala), nsv.

Mayelanu ni ntlawa wa ^{vu}14 (vu)

Ntlawa lowu wutalisa kupatsra mazritu lamasungulaka hi “vu-” (kumbe “wu-”), “vo-” na “bz-”. Kambe lesvo asvijuli kuhlaya lesvaku minkama hinkwayu mazritu lamasungulaka hi sviyaki lesvo i ya ntlawa wa ^{vu}14(vu). Hi xikombiso, mazritu “**bzatsrhu**” na “**bzitanana**” malumba ntlawa wa ^{vu}5 (dzri-). Xilesvo, ku vunyingi maya ku ntlawa wa ^{vu}6 (ma-): “**mabzatsrhu**”, “**mabzitanana**”. Handle ka lesvo, ku ni mazritu man'wana, ya kufana na “**bzala**”, “**bzanyi**”, “**voya**”, manga ku ntlawa wa ^{vu}5 (dzri-) hilesvi mankontekaka mava matlulela ku ntlawa wa ^{vu}6 (ma-). Hi xikombiso, hingaku: “bzanyi **dzrin**'we”; “mabzanyi **mazrazru**”; kumbe: “voya **dzrin**'we”, “**ma**voya **ma**bidzri”.

Kambe mangathela mabekiwa ku ntlawa ^{vu}14 hilesvi mavo-niwaka svanga lamangankontekikiki. Hi xikombiso, hingaku: “**Bza**nyi **bza** kudzringana kufulela yindlu”; kumbe: “Khakhata **voya** **bza** hamba”. Handle ka lesvo, mazritu matsrongo ya kufana na “**vusva**”, “**vulongo**”, “**vuso**”, mapfumela kuya ku vuningi (ntlawa wa ^{vu}6) mava: “**ma-**vusva”, “**ma**longo”, “**ma**vuso”; kambe lesvo kova xiyimu xa kukheteka, kunge nawu, hikusa asvosindzrisa kutizrisa vuningi.

Mayelanu ni kunkonteka ni kungankonteki ka mavito

Mavito hinkwawu lamayimeliwaka hi mintlawa ya wone matikomba lesvaku mankonteka hi mpfumelo kusuka ku vun'we maya ku vuningi. Loko mayala, svikomba lesvaku amakonteki. Amhakeni leyi, svajuleka kuxiya lesvaku mavito ya ntlawa wa

^{vu}11 (li-) mankonteka ntsena loko mahlaya minchumu lemivoniwaka kumbe kuyingeliwa. Svikombiso:

- Likuku, lisimu, litiho, likambu, linhi, nsv.

Kambe amankonteki loko mali sviyanakanyiwa sva ntshima, lesvitlhamuxelaka matsrhamela, matitwela kumbe mavabzi. Svikombiso:

- Lizrandzru, lizrezre, lifuva, lihlanyi, lihuhe, lifuyu, nsv.

Xiya, nambitanu, lesvaku zritu “**lifu**” dzrapfumela kuya ku vuningi, “**mafu**”, kunge hilesvi dzrinkontekaka kambe hilesvi kuvulavuliwaka hi minkama leyi lifu dzrihumelelaka ha yone. Hi xikombiso:

- Masiku lawa mafu i manyingi.

Hi vugamu, mavito “**vusokoti**” na “**vusuna**” amakonteki, hikusa matlhamuxela xiyimu xa vunyingi lebzikulu. Vito “vusokoti” dzritiseketela ku “nsokoti”. Vito “nsokoti”, ledzringa ku ntlawa wa ^{vu9} (yi-) ku vunyingi i “**ti**nsokoti”, kambe lesvo svotizra loko kuli kusukela ka tinsokoti tibizri na tivoniwa svanga letinkontekaka. Kutani loko hiku “vusokoti”, hihlaya nhlayu yikulu ya tinsokoti leti hitivonaka svanga letingankontekikiki. Svafana ni loko hikhanela hi “vusuna”. Vito “vusuna” dzritiseketela ku “nsuna”. Vito “nsuna”, dzri le ku ntlawa wa ^{vu9} (yi-), kutani ku vunyingi i “**ti**nsuna”. Lanu hihlaya kusukela ka tinsuna tibizri na tivoniwa svanga letinkontekaka. Kutani loko hiku “vusuna”, hihlaya nhlayu yikulu ya tinsuna leti hitivonaka svanga letingankontekikiki. Hi tlhelo dzrin'wana, vito “**nhlanga**” dzrikomba kungankonteki, kambe vito

“**lihlanga**” dzrapfumela kuya ku vunyingi dzriva “**tinhlanga**”, komboka kunkonteka.

Mayelanu ni sviyimu lesvihu-maka ndleleni

Minkama min'wana, mavito man'wana amalandzri milawu ya mpfumelelanu ya ntlawa wa wone. Hi xikombiso, vito “nsimu” dzri le ku ntlawa wa vu-11 (li-). Xilesvo, ku vunyingi inha dzriya ku ntlawa 10b (tin-). Kambe lesvo afa svitayenca dzriva “**ti**nsimu”, dzricinca ntlhamuxelo wa dzrone. Akuva vatlhantlha xikwitsri lexi, Vazronga vadzriyisi ku ntlawa wa ^{vu6} (ma-) ku vunyingi, dzriva “**ma**simu”.

Xikombiso xin'wana i xa vito “nandzra”, ledzrilumbaka ntlawa wa ^{ku1} (mu-) ku vun'we, nakuve ku vunyingi dzriya ku ntlawa wa ^{vu6} (ma-). Xisvosvo, hili: “nandzra mun'we”, “nandzra wa”, “na-

ndzra gsekeleka”, nsv.; kambe hiku: “malandzra mabidzri”, “malandzra ya”, “malandzra masekeleka”, nsv. Afa svitalongoloka ha hombe loko hiku: “nandzra mun’we” (ntl. 1-mu-) higama hiku “vanandzra vabidzri”, kambe Xizronga xayala. Xivosvo, hichatisa mintlawwa leyi hi ntolovelolo mingalongolokikiki (ntl. 1-mu- na ntl. 6-ma-) ama-tsran’wini ya ntl. 1-mu- na ntl. 2-va-).

Xikombiso xin’wana mfuzri i xa vito “lihlovo”. Svanga vito dzra ntl. wa ^{vu}11 (li-), zritu ledzri anha dzringatlulela ku vuningi dzriya ku ntlawa wa ^{vu}10b (tin-), dzriya “tinhlovo”. Kambe, hilaha hisvivonaka hakone, zritu “tinhlovo” dzringalutukeliwa ni dzra vuningi bza “nhlovo”. Sviliki, mhunu angapimisa lesvaku hikhanela hi “svihlovo”, nakuve hihlaya “tinxaka”. Xilesvo, svangahesvi

zritu ledzri nangweso dzripfumelelaka kuvitaniwa “muhlovo” ku vun’we, Vazronga vatlhantlha xikwitsri hi kutizisa mavumbela man’wana, vaku vuningi bza “lihlovo” i “mihlovo”. Lani, vito dzritizisa vuningi hi ntlawa wa ^{vu}4, kambe lesvo svikumeka na sviyamukeleka kutlula kudzolonganisa miyanakanyu ya vhanu.

Xikombiso xin’wanyana (xa vugamu ku nkambisiso wezru) i kutsrongahatiwa ka mavito ya ntlawa wa ^{ku}1 (mu-) hi kutizisa mfungu wa mpfumelelanu wa ntlawa wa ^{vu}7 (xi-). Loko hiyenca lesvo, hiyencela kukomba matitwela ya kukheteka hi lweyi hikhanelaka ha yene – kungahavaka lizrandzru kumbe xinyenyo. Hi xikombiso:

1. Kutani loko nuna abuya he kunweni ni vusiku, atlhasa aba xipfulu, aku: «Nkata, nipfulele xipfalu!» Kambe

nsati wa kone **xo-**ntse,
xitama xitiyettelela.

2. Azrandzri **nuna xa** ku ni
kutizra **axitizri**.

MAVITO YA KUSUNGULA

Mavito ya kusungula hi lawa mavumbiwaka hi **xizrangi** xa ntlawa wa mavito lowu zritu dzrilumbaka wone ni **limitsru**. Xizrangi xacinca, xisusa zritu ku vun'we dzriya ku vuningi, kumbe xicinca ntlhamuxelo wa zritu. Kambe limitsru dzritsrhama na dzringacinci. Svikombiso:

- **mu**dzrimi (**va**dzrimi),
ntsrongwana,
(**va**tsrongwana), **lisimu**, (**tin-**
simu), **xiluva** (**sviluva**), **vu-**
longo, (**ma**longo), nsv.

Xiya, nambitanu, lesvaku kutala ka mavito ya ntlawa wa ^{vu}14 (vu-).

ama na xivumbeko xa vuningi. Xiya nangweso lesvaku mavito

man'wana ama na xizrangi; mova ni limitsru ledzrimakombekisaka svanga ya ntlawa wa kuzazi. Svikombiso:

- **Ø**buwana, (**ma**buwana),
Øchuzri (**ma**chuzri), **Ø**hosi
(**ti**hosi), **Ø**chati (**ma**chati),
Ømbzana (**ti**mbzana), nsv.

MATSRHAMELA NI MASUNGULU YA MAVITO

Handle ka kuva mavito mava ni xizrangi (lexingavonekaka kumbe ihina) ni limitsru, mavito hinkwawu ya Xizranga magama hi xin'we xa svitwali lesvi: /a/, /e/, /i/, /o/ na /u/. Svikombiso:

- **Vu**sva, **xile**mbe, **nye**leti,
voko, **bomu.**

MAVITO YA MPATSRANU

Mavito ya mpatsranu hi lawa mapfelaka ka kupatsriwa ka mazritu mabidzri kumbe kutlula. Svikombiso:

a) Mafandleve (ma+fa+ndleve)

b) Makholwahikusvivona
(ma+kholwa+hi+ku+svi+vona)

c) Nkavavangaheti
(nkava+vanga+heti)

Vunavi bza mavito ni svilandzri sva vunavi

Limitsru, ledzri hakanyingi dzri-
hiyisaka ku liyenci svanga zritu
dzra masungulu, dzrapfumela
kunava akuva kupsaliwa mazritu
mampsha lamanga mavito.
Vona svikombiso sva kusukela ku
limitsru -yak- (liyenci kuyaka):

- a) Muyaki (ntl. 1 – mhunu
lwayakaka)
- b) Muyako (ntl. 3 – nchumu
lowuyakiwiki)
- c) Vuyaki (ntl. 14 – ntizro wa
kuyaka)
- d) Xiyaki (ntl. 7 – ntivi ya
kuyaka)

- e) Mayakela (ntl. 6 – ndlela
ya kuyaka)
- f) Kuyakeni (vukombam-
bangu – mbangu wa
kuyaka)
- g) Muyakelani (ntl. 1 –
mhunu lwayakelaniki na
wene)

Svatikomba lesvaku, handle ka
xizrangi, xilandzri xa vugamu le-
xitzizisiwaka ku limitsru xi ni lisima
dzrikulu akunyikeleni ka ntlhamu-
xelo wa zritu. Hingakatsrakanya
ntizro wa svilandzri hi ndlela
leyinga ku nxaxameto 1.

NXAXAMETO 1: VUNAVI BZA VITO – NTIZRO WA XIZRANGI NI XILANDZRI

#	NTLAWA	NTIZRO	SVIKOMBISO:
1.	1,2, 7,8	Muvangi (mu-i)	<u>Muyaki</u> , <u>vayaki</u> , <u>xiyaki</u> , <u>sviyaki</u> , <u>mukini</u> , <u>vakini</u> , <u>xitizri</u> , <u>svitizri</u>
2.	7,8	Xitizro (xi-o/u)	<u>Xikelelo</u> , <u>xisivo</u> , <u>xifenyō</u> , <u>xizrazru</u> , <u>xifambu</u> , <u>xipfalu</u>
3.	6	Yencela (ma-a)	<u>Matizrela</u> , <u>madela</u> , <u>manwela</u> , <u>mahanyela</u> , <u>makhanelela</u>
4.	15	Kundzruluta (ku-hata)	kuhunuhata, kuntsrhatihata, kutsrongahata
5.	-	Vukomba- mbangu ((a)- eni/ini)	(a)nhoveni, (a)mombzeni, (a)nkileni, (a)nhan'wini, (a)mitini
6.	7,8	Ntsrongahatiho (xi- ana/- nyana/-tana)	Xintihwana, xibukwana, mati- nyana, xigumatana
7.	21, 6	Nkulisiwo (ji- /ma-)	Jimombo (majimombo), jinomu (majinomumu), jihomu (majihomu)
8.		Kunsatihata (-kazi/-kati)	Ndlopfukati, xikwembukati, nkosikazi, dodakazi
9.	3,4	Handzru wa xiyenco (mu- o/u)	Mbhasiso, mfambu, nkino, nka- zralu, ntlangu

Xiya lesvaku, mayelanu ni yinhla ya ^v3, vunavi bza yencela bza-koteka nambi hingabekanga ma-. Kutlula kolanu, hingabeka -e avugan'wini amatsrhan'wini ya -a. Svikombiso:

- Tizrela, dela, nwela, hanyela, khanelela; kumbe:

- Matizrele, madele, manwele, mahanyele, makhanelele

Nambitanu, ahitizrisi -o amatsrhan'wini ya -a kumbe -e, hikusa lawo i mavulavulela ya Xichangana.

Ntsrongahatiwo

Ntsrongahatiwo i ndlela ya kucinca mazritu lesvaku nchumu lowu wuhlayiwaka wuvoniwa na wuli wutsrongo, wuyeyiseka kumbe wuzrandzreka. Svikombiso:

- Gumana (xigumatana), lihlelo (xinhlelwana), timbzana (svimbzanyana), nsv.

MAYAKELA:

Akuva hitsrongahatisa mazritu hitizrisa:

- a) xizrangi akusunguleni ka zritu (**xi-**, ku vun'we, ni **svi-**, ku vunyingi) ni
- b) xilandzri avugan'wini bza dzrone (kungavaka **-ana**, **-nyana** kumbe **-atana** hi kuya hi zritu ni ntlhamuxelo lowu hijulaka kuwutlhasisa.

Xiya lesvaku, nambilesvi mavito manga ku mintlawwa ya kuha-

mbanahambana, loko matsrongahatiwa, hinkwawu maya ku ntlawa wa ^{vu}7 (xi-), ku vun'we, ni wa ^{vu}8 (svi-) ku vunyingi. Nambisvilitanu, xilandzri axibekiwi ntsena; kulandzriwa milawu ya kone.

1) NTSRONGAHATIWO HI XI-LANDZRI -ANA

Hitizisa xizrangi **xi-/svi-** ni xilandzri **-ana** ku mavito hi tindlela leti:

1. Svitwali <a>, <e> e <i>, lesvinga vugan'wini bza mavito, svidiwa hi /a/ wa xilandzri **-ana**. Hikolanu, svanyamalala, svinyisela xilandzri **-ana**. Svikombiso:
 1. Kamba: xi+kamba+ana → xikambana
 2. Hele xi+hele+ana → xihelana

3. Nhlampfi
xi+nhlampfi+ana → xinhlampfana

2. Xitwali <u>, loko xitlhangana ni xitwali xa xilandzri **-ana**, xindzruluka <w>.

Nawu lowu awutizri loko xitwali <u> xibuya

antsrhaku ka <f>, laha xidiwaka hi xitwali <a> xa xilandzri **-ana**. Svikombiso:

1. Huku: xi+huku+ana → xihukwana (Kunge: xihukwana)
2. Mutsru: xi+mutsru+ana → ximutsruwana (Kunge: ximutsruwana)
3. Khofu xi+khofu+ana → xikhofana (Kunge: xikhofwana)
4. Lepfu xi+lepfu+ana → xilepfana (Kunge: xilepfwana)

3. Xitwali <o> lexinga
vugan'wini dzra zritu, na
xone loko xitlhangana ni
xitwali xa kusungula /a/ xa
xilanzri **-ana**, xindzruluka
<w>. Svikombiso:

1. Voko: xi+voko+ana →
xivokwana (Kunge: ~~xive-~~
~~keana~~)
2. Xitolo: xi+tolo+ana → xi-
tolwana (Kunge: ~~xitele-~~
~~ana~~)
3. Gogogo: xi+go-
gogo+ana → xigogo-
gwana (Kunge: ~~xigege-~~
~~geana~~)

4. Loko peletwana dzra
vugamu dzra vito dzrigama
hi <mo> kumbe <mu>,
dzrindzruluka <n'w> loko
dzritlhangana ni xilanzri -
ana. Svikombiso:

1. Homu: xi+homu+ana →
xihon'wana (Kunge: ~~xih-~~
~~muana~~)

2. Muggomo: xi+muggomo
(ngqomo)+ana →
xingqon'wana; (Kunge:
xingqomeana)

5. Loko peletwana dzra
vugamu dzra zritu dzri-
gama hi <bo>, <bu>, <vo>
kumbe <vu>, dzrindzruluka
<bz> loko dzritlhangana ni
xilanzri **-ana**. Svikombiso:

1. Mombo:
xi+mombo+ana → xi-
mombzana (Kunge: ~~xi-~~
~~membeana~~ nambi ~~xi-~~
~~membana~~)
2. Zrambu: xi+zrambu+ana
→ xizrambzana (Kunge:
~~xizrambuana~~ nambi
~~xizrambana~~)
3. Nhlovo: xi+nhlovo+ana
→ xinhlobzana (Kunge:
~~xinhloveana~~ nambi
~~xinhlovana~~)
4. Nkhuvu: xi+nkhuvu+ana
→ xinkhubzana (Kunge:

xinkhuvuana nambi
xinkhuvana)

6. Handle ka lesvi, svayenceka peletwana dzra vugamu dzra zritu dzrigama hi <pu>. Lanu ke, dzrindzruluka <ps> loko dzritlhangana ni xilandzri - **ana**. Ku xikombiso, lexi hinga naxu, hasvivona lesvaku zritu dzrisindzrisa kutizrisiwa ku vunyingi, hikusa, hi ntolovelo, dzrihlaya nchumu lowungankontekikiki.

1. Mpupu:
svi+mpupu+ana → svimpupsana (Kunge: svimpupuana nambi svimpupana)

2) NTSRONGAHATIWO HI XILANDZRI -ATANA

Hitizrisa xizrangi **xi-/svi-** ni xilanda-

ndzri **-atana** ku mazritu ya kuka-zri lamagamaka hi **-ana** hi ntumbuluku wa wone na mangatlhamuxeli ntsrongahatiwo.

Akuva **-ana** wa ntumbuluku angalutukeliwi ni **-ana** wa xilandzri, himusiva hi xilandzri -

atana. Svikombiso:

1. Gumana: xi+gumana+atana → xigumatana
2. Nyangana: svi+nyangana+atana → svinyangatana¹
3. Lompfana: xi+lompfana+atana → xilompfatana
4. Nyokana: xi+nyokana+atana → xinyokatana
5. Nzhululwana: xi+nzhululwana+atana → xinzhululwatana
6. Zambana: xi+zambana+atana → xizambatana
7. Hlolana: xi+hlolana+atana → xihlolatana
8. Sengana: xi+sengana+atana → xisengatana

¹ Xiya lesvaku amhakeni leyi, hitizrisa xizrangi **svi-**, ku vunyingi, hikusa, hi ntolovelo, afa hingatikhanela hi

kamba dzrin'we dzra nyangana kambe hi makamba ya kuhlwawa.

9. Ndzrewana: xi+ndz-rewana+ -atana → xindz-rewatana

3) NTSRONGAHATIWO HI XI-LANDZRI -ATATANA WA KUTLAKUXISA

Hisvionile lesvaku, handle ka xizrangi **xi-/svi-**, ni xilandzri **-ana**, hingatizrisa xilandzri **-atana** ku mazritu lawa hi ntumbuluku magamaka hi **-ana**. Nambisvilitanu, hingahatlhela hitizrisa xilandzri **-atatana** akuva hitlakuxisa vutsrongo bza zritu ledzri hidzritsrongahataka. Amhakeni leyo, hisusa **-ana** kumbe **-atana**, hisiva hi **-atatana** akuva hitlakuxisa mongo wa ntsrongahatiwo. Svikombiso:

1. Gumana: xi+gumana+ -atatana → xigumatatana
2. Nyangana: svi+nyangana+ -atatana → svinyangatatana

3. Lompfana: xi+lompfana+ -atatana → xilompfatatana
4. Nyokana: xi+nyokana+ -atatana → xinyokatatana
5. Nzhululwana: xi+nzhululwana+ -atatana → xinzhululwatatana
6. Zambana: xi+zambana+ -atatana → xizambatatana
7. Hlolana: xi+hlolana+ -atatana → xihlolatatana
8. Sengana: xi+sengana+ -atatana → xisengatatana
9. Ndzrewana: xi+ndz-rewana+ -atatana → xi-ndzrewatatana
10. Yindlu: →xiyindlwana→ xiyindlwatana→ xiyindlwatatana.
11. Tandzra: →xitandzrana→ xitandzratana→ xitandzratatana.
12. Khondlo: →xikhondlwana→ xikhondlwatana→ xikhondlwatatana.

4) NTSRONGAHATIWO HI XI- LANDZRI –NYANA

Hi Xizronga, hingathela hitizisa xizrangi **xi-/svi-** kun'we ni xilandzri **-nyana** ku mavito mange mangani. Svikombiso:

1. Mbzana – ximbza-nyana/svimbzanyana.
2. N'wana – xin'wananyana/svivananyana.
3. Mali - (Ø)mali-nyana/svimalinyana

Nambitasu, xilandzri **-nyana** xingathela xitizisiwa ni xizrangi **xi-/svi-** ku mavito manyingi, kambe ntsena loko mazranga hi kutizisa xilandzri **-ana**. Lesvo hisviyencela kupumba ntsrongahatiwo akuva wungayenci nchumu kumbe mhunu wa kone svidzreleka, kambe sviva lesvizrandzrekaka. Svikombiso:

1. Madala– xidalana- xidalananyana

2. Mafuzra– svifuzrana – svifuzrananyana
3. Munyu– svimunywana – svimunywananyana
4. Wusva– sviwusvana – sviwusvananyana
5. Zribze– xizribzana - xizribzananyana

Xiya lesvaku xilandzri **-nyana** mfuzri xingatizisiwa ni mavito manyingi na kungabekiwanga xizrangi **xi-/svi-**, kukomba lizrandzru kumbe kupumba kuso-leka loku ntsrongahatiwo wungavaka naku. Svikombiso:

1. Muyivi – muyivinyana
2. Mufana – mufananyana²
3. Mufundhisa – mufundhisanyana
4. Bzala – bzalanyana
5. Ntlawa – ntlawanyana
6. Mholova – mholovanyana

² Xiya kukheteka ka *mufana*, angavaka *xifanyana* na *xifanyatana*.

Xilandzri **-nyana** xingahatlhela xitizisiwa ni mavito lawa hi nto-lovelo matlhamuxelaka matsrhamele lamangankontekikiki, kumbe sviyanakanyiwa. Ku sviyimu lesvo, vito adzricinciwi; svadzringana kudzribekela xilandzri - **nyana** avugan'wini. Svikombiso:

1. Mona – monanyana
2. Lizrandzru – lizrandzrunyana
3. Nkanu – nkanunyana
4. Nkama – nkamanyana
5. Timpsalu – timpsalunyana
6. Tingana - tingananyana
7. Lihlanyi – lihlanyinyana
8. Mahlundzru – mahlundzrunyana
9. Vumphunta – vumphuntanyana
10. Kuzrula – kuzrulananyana

VUKOMBAMBANGU

Vukombambangu i dzrin'we dzra matsrhamela ya tindzrimi ta Xintu. Hi Xizronga vukombambangu bzikoteka hi kupatsra xilandzri -eni/-ini ni vito. Xilandzri -eni/-ini xitizrela kukombambangu lowu nchumu wa kuka-zri wunga ku wone, wusukaka ku wone kumbe wuyaka ku wone. Hi xikombiso, hingahavona vukombambangu ku bulu dzra kufana ni ledzri:

—Uya kwini?

—Niya (a)ntizrweni.

Amhakeni leyi, vito “ntizro” dzricinciwile hi kunhingenela ka zritwana dzra mpfumawulu “a” amahlweni ka vito (“ntizro”) ni kusuka ka <o> avugan'wini dzra zritu “ntizro”, kutsrhama <weni> (svipfelaka ku w+eni). Nambitanu, ahi nsindzriso kutizrisa zritwana dzra mpfumawulu “a” amahlweni ka vito. Svoya hi lesvi

mhunu atilangelaka svone. Xilesvo, hingaku: “ntizrweni” kumbe “antizrweni”.

Akuva hitiva ntlhamuxelo wa xilandzri xa vukombambangu -eni/-ini, kujuleka hizranga hi kutwisisa ntlhamuxelo wa liyenci ledzringa ndzreni ka xiga. Svikombiso:

1. N'wana a le nsinyeni.
2. N'wana atizra nsinyeni.
3. N'wana aya nsinyeni.
4. N'wana akhandzriya nsinyeni.
5. N'wana axika (hi le) nsinyeni.
6. N'wana asuka nsinyeni.

Ku svikombiso lesvibidzri sva kusungula, liyenci dzripfuna xilandzri xa vukombambangu kukomba mbangu lowu n'wana *anga ku wone*. Ku svikombiso lesvin'wana, liyenci dzripfuna xilandzri xa vukombambangu kukomba mbangu lowu n'wana

ayaka, afambafambaka kumbe asukaka ku wone.

MAYENCELA YA VUKOMBA-MBANGU

1) Loko vito dzrigama hi <a> hi-susa <a>, higama hibeka -eni.

Svikombiso:

1. Nyama – nyameni
2. Sizra – sizreni
3. Nkava – nkaveni
4. Misava – misaveni
5. Ndlela - ndleleni

2) Loko vito dzrigama hi <e>, hi-susa <e>, higama hibeka -eni.

Svikombiso:

1. Nhleke – nhlekeni
2. Zreve – tsrheveni
3. Vulombe – vulombeni
4. Ndleve – ndleveni
5. Musele – museleni

3) Loko vito dzrigama hi <o>, hi-susa <o>, higama himusiva hi

<w> na hingasibeka -eni. Svikombiso:

1. Lihlelo – lihlelweni
2. Tihlo – tihlweni
3. Hotsro – hotsweni
4. Voko – vokweni
5. Lozro – lozweni

Xiya lesvaku, minkama min'wana, nambi zritu dzrigama hi <a>, kuchuka kunhingenela xilandzri -ini. Kambe lesvo asvilandzri nawu; kova mukhuva wamavulavulela ntsena. Hi nkonta ya lesvo, svitolovelekile ngopfu kuyingela Vazronga vaku:

1. Ximphamanini (svipfelaka ku “ximphamana”; inhaka kuli ximphamaneni)
2. Xidoropanini (svipfelaka ku “xidoropana”; inhaka kuli xidoropaneni)
3. Mhazranini (svipfelaka ku “mhazrana”; inhaka kuli mhazraneni)

4. Xinkanyanini (svipfelaka ku “xinkanyana”; inhaka kuli xinkanyaneni)
5. Vusiwanini (svipfelaka ku “vusiwana”; inhaka kuli “vusiwaneni”)
6. Vutsrongwanini (svipfelaka ku “vutsrongwana”; inhaka kuli vutsrongwaneni)

Lesvo svingava svivangiwa hilesvi mazritu mange mangani lamagamaka hi -ana matlhelaka mapfumela kugama hi -ani. Hi xikombiso, Vazronga vahlaya lesvaku: mun'wani (mun'wana), mumbenyani (mumbenyana), nsv. Kambe, kuhambana ni Vachangana, Vazronga avahlayi lesvaku: xintihwani (xintihwana), xihukwani (xihukwana), ximovhani (ximovhana), nsv. Vachangana afa vatava na vahlaya svone loko vaku: xidoropanini (hikusa svipfela ku xidoropani), xiyindlwanini (hikusa svipfela ku

xiyindlwani, xinkuhlwanini (hikusa svipfela ku xinkuhlwani), vusiwanini (hikusa svipfela ku vusiwani), nsv., kambe ku Xizronga svikumeka na xiva-ngelo xa kone xingatwali. Xilesvo, hingaku kuhuma loku ndleleni kungava kuli kunhingenela ka ntamu wa -ini a-mbangwini wa -eni, kumbe nku-cetelo wa lidzrimi dzra Xichangana. Xilesvo, nambiloko Vazronga vanyingi vangatwa “xinkajwaneni” na atsrhuna, hi kutolovela “xinkajwanini”, mhaka hi lesvaku ledzra kusungula dzrilandzra nawu wa mavulavulela manene ya Xizronga.

4) Loko vito dzrigama hi <i>, hisusa <i>, higama hibeka -ini.

Svikombiso:

1. Mati – matini
2. Ximati – ximatini
3. Tlavi – tlavini
4. Muzri - muzrini

5. Muti - mutini

5) Loko vito dzrigama hi <u>, hisusa <u>, higama himusiva hi <w> na hingasibeka -ini. Svikombiso:

1. Muzru – muzrwini
2. Siku – sikwini
3. Tilu – tilwini
4. Zritu – zritwini
5. Mbangu – mbangwini

Xiya lesvaku ku ni mavito man'wana lamakhetekiki, lamangalandzrikiki nawu lowunga la henhla. Hi lamagamaka hi “-fu”/ “-pfu”. Svikombiso:

1. Xiphifu – xiphifini (kunge xiphifwini)
2. Malepfu – malepfini (kunge malepfwini)
3. Xilepfu – xilepfini (kunge xilepfwini)
4. Nkopfu – nkopfini (kunge nkopfwini)

5. Nhompfu – nhompfini
(kunge nhompfwini)
 6. Tindlopfu – tindlopfini
(kunge tindlopfwini)
- 6) Loko vito dzrigama hi “bo”, hisusa “o” higama himusiva hi z (amatsrhan'wini ya w) na hingasibeka -eni. Svikombiso:
1. Dzovo – dzobzeni (kunge dzovweni kumbe dzoveni)
 2. Tsrhovo – tsrhobzeni (kunge tsrhovweni kumbe tsrhoveni)
 3. Tobo – tobzeni (kunge tobweni kumbe tobzeni)
 4. Khombo – khombzeni
(kunge khombweni kumbe khombeni)
- 7) Loko vito dzrigama hi “bu”, hisusa “u” higama himusiva hi z (amatsrhan'wini ya w) na hingasibeka -ini. Svikombiso:
1. Zrambu – zrambzini (kunge zrambwini kumbe zrambini)
2. Xifambu – xifambzini
(kunge xifambwini kumbe xifambini)
- 8) Loko vito dzrigama hi “vo”, hindzruluta v ava b hiva hisusa “o” higama himusiva hi z (amatsrhan'wini ya w) na hingasibeka -eni. Svikombiso:
1. Nhlovo – nhlobzeni (kunge nhloveni)
 2. Xihlovo – xihlovo (kunge xihloveni)
 3. Huvo – hubzeni (kunge huvweni)
- 9) Loko vito dzrigama hi “vu”, hindzruluta v ava b hiva hisusa “u” higama himusiva hi z (amatsrhan'wini ya w) na hingasibeka -ini. Svikombiso:
1. Nkhuvu – nkhubzini (kunge nkhuvwini kumbe nkhuvinini)
 2. Timpfuvu – timpfubzini
(kunge timpfuwini kumbe timpfuvini)

10) Loko vito dzrigama hi “mo”, hindzruluta mava n’ hitlhela hisusa “o” himusiva hi w na hingasibeka -eni. Svikombiso:

1. Nomo – non’weni (kunge ~~nomweni~~)
2. Mfumo – mfun’weni (kunge ~~mfumweni~~)

11) Loko vito dzrigama hi “mu”, hindzruluta mava n’ hitlhela hisusa “u” himusiva hi w na hingasibeka -ini. Svikombiso:

1. Nomu – non’wini (kunge ~~nomwini~~)
2. Mfumu – mfun’wini (kunge ~~mfumwini~~)
3. Masimu – masin’wini (kunge ~~masimwini~~)
4. Tihomu – tihon’wini (kunge ~~tihomwini~~)
5. Mumu – mun’wini (kunge ~~mumwini~~)

KUHUMA NDLELENI LO-KUVONEKAKA NAMUNHLA

Namunhla wa siku kuvoneka kuhuma ndleleni ku vukombambu bza mazritu vutomi na xizrami. I vanyingi valiki “vuton’wini” na “xizran’wini”. Lesvo asvipfumelelani ni nawu wa vukombambangu hi svivangelo lesvi:

1. Zritu vutomi dzrigama hi -i; xilesvo, loko dzriya ku vukombambangu dzrifanela kuva “vutomini”.
2. Zritu xizrami dzrigama hi -i; xilesvo, loko dzriya ku vukombambangu dzrifanela kuva “xizramini”.

Xiya lesvaku, ku mhaka ya “xizramini”, i sva lisima kulandzra nawu wa vukombambangu akuba hingaphazameli zritu ledzri ni dzrin’wana ledzrifanaka svinene: “xizran’wini”. Hi

Xizronga ku ni zritu “xizramu”, le-dzritlhamuxelaka “pulangu, mhandzre kumbe nsimbi leyibekiwaka ahenhla ka nyangwa/xipfalu akuva yikhoma minchumu lemintlhante-keliwaka”. Xilesvo, loko hiku: “Ku ni nkolombza axizran’wini”, hijula kuhlaya lesvaku “ku ni nkolombza ku mbangu lowunga henhla ka nyangwa/xipfalu”. Kasi loko mhunu ali ku mbangu wa “xizrami”, hili a le “xizramini”.

Loko hoku: “Ku ni nkolombza axizran’wini” na hipimisa “xizrami”, hingalahla vayingiseti, hikusa vangesvitivi lesvaku nkolombza wu le ku mbangu wa yindlu kumbe wa kutitimeta. Lesvo afa svingafanelanga kuyenceka, hikusa nawu wa mavulavulela wusvibeka livaleni lesvaku zritu “xizrami” dzrifanela kuva “xizramini” loko kuhlayiwa mbangu wa kutitimeta.

Nkulisiwo

Nkulisiwo wa mavito hi loko vito dzribekeliwa xizrangi lexiyencaka lesvaku nchumu wuvoniwa na wuli wukulu hi ndlela leyihundzrisaka mpimu. Hakanyingi mavoniwa hi ndlela ya xisandzru. Ma-

vito lawo matizrisa xizrangi xa ntlawa wa ^{vu}21 (ji) ku vun’we, lamangagamaka mayisiwa ku ntlawa wa ^{vu}6 loko mali ku vuningi: Svikombiso:

Nhl.	VUN’WE	VUNYINGI
1)	jivusva	<u>majivusva</u>
2)	jihembe	<u>majihembe</u>
3)	jinkhancu	<u>majinkhancu</u>
4)	jinhloko	<u>majinhloko</u>
5)	jimovha	<u>majimovha</u>

Publicidade

Kaya Software, Lda

Somos uma empresa nacional com muita experiência e profissionalismo no ramo de Web Marketing.

PÁGINAS WEBS & LOJAS VIRTUAIS

Criamos Páginas Webs e Lojas Virtuais Responsivas de Alta Qualidade.



SGE & SGA
SISTEMA DE GESTÃO ESCOLAR & ÁGUA
Sistema De Gestão E Facturação Do Consumo De Água.



CRIAÇÃO DE APLICATIVOS
Desenvolvemos Aplicações Inteligentes, Flexíveis e Responsivas.



REDES & MANUTENÇÃO DE PC
Fazemos Manutenção de Redes, Hardware, Software e Base de Dados.



Entre em contacto!

Rua Nº 2, Cidade da Matola, Moçambique; +258 84-758-7060 / 84-774-3719; Email: kayasoftwarelda@gmail.com

Xitlhokovetelo

VUNANGA I MUZRI

Kuwiseni kwanga

Ni vanghanu vanga,

Hiteka tinanga

Hichaya vunanga.

Vunanga i muzri!

Nambi ka minkosi,

Bzidaha mintsrhosi.

Hiyimba miloti

Hi svo svitiloti.

Vunanga i muzri!

Nibzizrandzra ngopfu;

Bzinitlema mbilu.

Minkama hinkwayu

Vunanga i muzri!

Vunanga i muzri!

DONDZRA XIZRONÇA: EXPRESSÕES ÚTEIS EM RONÇA

#	XIZRONÇA	PORTUGUÊS
1.	Wasvizrandzra kukina?	Gostas de dançar?
2.	Ina, nasvizrandzra.	Sim, gosto.
3.	Nasvizrandzra, kambe anisvikoti.	Gosto, mas não sei dançar.
4.	Uzrandzra kuyenca yini hi kuhela ka vhiki?	O que gostas de fazer no fim de semana?
5.	Nizrandzra kufamba nitlanga ni ndangu wanga.	Gosto de ir passear com a minha família.
6.	Wene-ke, uzrandzra kuyenca yini?	E tu? O que gostas de fazer?
7.	Mine nizrandzra kutsrhama kaya niyetlela.	Gosto de ficar em casa dormir.
8.	Wasvizrandzra kuhlalela TV?	Gostas de assistir à TV?
9.	Ina, kambe ahi ngopfu.	Sim, mas não tanto.
10.	Wamazrandzra marabenta?	Gostas de marrabenta?
11.	Nimazrandzra ngopfu svinene.	Gosto tanto.
12.	Wasvizrandzra kuyimbelela?	Gostas de cantar?
13.	Anisvizrandzri. Zritu dzranga dzribihile.	Não gosto. Não tenho boa voz.
14.	Wasvizrandzra kubela bola?	Gostas de jogar futebol?
15.	Ihina, kambe nasvizrandzra kuhlalela.	Não, mas gosto de assistir.
16.	I vunanga muni ubzizrandzraka?	Qual é a tua música favorita?
17.	I marabenta ni jazz.	Marrabenta e jazz.
18.	Na mine namazrandzra marabenta.	Eu também gosto de marrabenta.
19.	Anisvizrandzri kufamba nitlanga ni vusiku.	Não gosto de sair à noite.
20.	Nambi mine anisvizrandzri.	Nem eu gosto.

HUNGATA HI KUDONDZRA

Tsrala vamahambananthamuxelo va mazritu lamalandzrelaka. Landzra xi-kombiso xa 1. Tihlamulo ku nhlayu leyilandzraka.

1. Kubasisa kunchimisa
2. Kubindzra _____
3. Kugoma _____
4. Kuhanyisa _____
5. Kuhlengeleta _____
6. Kunabzala _____
7. Kunandzrika _____
8. Kunyonxa _____
9. Kutiya _____
10. Kutlakula _____
11. Kuyettlela _____
12. Munghanu _____
13. Ntima _____
14. Ntlhazri _____
15. Pongwe _____
16. Vutomi _____
17. Vutoya _____
18. Xa ximbisi _____
19. Xihlayelamfuzri _____
20. Yimpi _____

TINHLAMULO TA NTIZRO WA NHL. 2/3/2023

1. Mabawa, 2. Tihukwa, 3. Makhokho, 4. Mihlovo, 5. Tinkuku, 6. Timbala, 7. Timbambu, 8. Tiyendzro, 9. Mimbenga, 10. Timfenhe, 11. Mpfundla, 12. Mimpfungulu, 13. Vayivi, 14. Vazrangeli, 15. Tindleve, 16. Minhlana, 17. Tinhlovo, 18. Minkila, 19. Minkuku, 20. Mavoko, 21. Svifenyoy, 22. Svimati



SERVIÇOS DE TRADUÇÃO E INTERPRETAÇÃO

Garanta serviços de alta qualidade pagando menos!

Os consultores da Dumbeka, Lda., são profissionais altamente qualificados e experientes na prestação de serviços de tradução e interpretação nestas línguas: Inglês, Francês, Espanhol, Alemão, Italiano, Mandarim e Línguas moçambicanas.

Os clientes que tenham um contrato de longa duração com a Dumbeka, Lda., obtêm um desconto de 25-30% dos preços vigentes.



Tradução de documentos pessoais, certificados, contratos, procurações, etc.

Tradução de documentos técnicos e científicos

Tradução literária

Tradução de relatórios

Serviços de interpretação consecutiva e simultânea

DUMBEKA, LDA

Rua de Vundiça Nº 235,

B. Liberdade, Cidade da Matola

Celulares: 845188424/

879999269/827194852

Visite www.dumbeka.com

Email: info.dumbeka@gmail.com